



## Nýr Landspítali staða framkvæmda og fréttir af verkefninu

- **Samningsundirritun vegna uppsteypu á bílakjallara undir Sóleyjartorgi**
- **Landlæknir í heimsókn**
- **Fréttir af uppsteypu meðferðarkjarna**
- **NLSH falið að vinna að verkefnum við sjúkrahúsið á Akureyri (SAk)**
- **Fjölbreytt dagskrá á sumarmálstofu NLSH**
- **Heimsókn frá þýskum fagaðilum**
- **SPITAL hópurinn heimsækir framkvæmdasvæðið**

## Samningsundirritun vegna uppsteypu á bílakjallara undir Sóleyjartorgi



Að undirritun lokinni: Hjördís Ýrr Skúladóttir, formaður MS félags Íslands, Willum Þór Þórsson, heilbrigðisráðherra, Þorvaldur Gissurarson forstjóri PG verk ehf og Sigríður Jóhannsdóttir, formaður Diabetes Ísland – félag fólks með sykursýki



Uppsteypa bílakjallara er hafin og verið er að steypa þrifalög og undirstöður

Þann 13. júní undirrituðu heilbrigðisráðherra, Willum Þór Þórsson, og Þorvaldur Gissurarson forstjóri ÞG verksamning við Nýjan Landspítala ohf. um uppsteypu á bílakjallara undir Sóleyjartorgi við hliðina á meðferðarkjarnanum. Samninginn vottuðu Hjördís Ýrr Skúladóttir, formaður MS félags Íslands og Sigríður Jóhannsdóttir, formaður Diabetes Ísland – félag fólks með sykursýki.

Gunnar Svavarsson, framkvæmdastjóri NLSH ohf, sagði við undirritunina að þetta sé enn einn áfanginn í uppbyggingunni við Hringbraut og fljótlega verði boðin út uppsteypa á nær 18.000 fermetra rannsóknahúsi og svo styttist í að uppsteypu meðferðarkjarnans ljúki.

Bílakjallarinn verður á tveimur hæðum undir Sóleyjartorgi ásamt tengigögum sunnan Landspítala. Bílakjallarinn verður staðsettur milli meðferðarkjarna og fyrihugaðrar byggingar dag-, göngu- og legudeilda Landspítalans austan við torgið, sem er sunnan megin við Gamla Landspítalann. Verða þar um 180 bílastæði fyrir þá sem eru að sækja þjónustu eða að koma í heimsóknir. Heildarflatarmál bygginganna er áætlað 7.500 m<sup>2</sup>. Upphæð samnings er: 1.381.693.926 (91,4 % af kostnaðaráætlun)

## Landlæknir í heimsókn



Ólafur M. Birgisson staðartæknifræðingur NLSH og Alma Möller landlæknir skoða framkvæmdir við meðferðarkjarnann

Þann 27. júní kom Alma Möller landlæknir í heimsókn og fékk kynningu á framkvæmdaverkefnum NLSH. Ólafur M. Birgisson, staðartæknifræðingur NLSH, sá um leiðsögn og var heimsóknin vel heppnuð enda viðraði vel til útiveru. Gengið var um framkvæmdasvæðið og upp á Stöng 1 í meðferðarkjarna þar sem vel sést yfir svæðið.

„Ég skrifaði mína fyrstu blaðagrein um nauðsyn þess að byggja nýjan Landspítala árið 2007, þá yfirlæknir gjörgæsludeildar við Hringbraut. Ég hef frá upphafi fylgst með því verkefni og var m.a. virk í notendastýrðri hönnun á þriðju hæð meðferðarkjarnans meðan ég starfaði á Landspítala. Það var því sérlega ánægjulegt að heimsækja byggingarsvæðið í morgun og sjá hvernig meðferðarkjarninn býtur upp og einnig að sjá framkvæmd og undirbúningsvinnu við aðrar byggingar. Ég óska Nýjum Landspítala áframhaldandi góðs gengis, íslenskri heilbrigðisþjónustu til heilla,“ segir Alma Möller.

# Fréttir af uppsteypu meðferðarkjarna



Reiknað er með að uppsteypu stanga og millibygginga meðferðarkjarna verði lokið á fyrsta ársfjórðungi 2024. Uppsetning útveggjaklæðningar stangar 1 hefst í október 2023

Vel hefur gengið í júnímánuði við uppsteypu meðferðarkjarnans.

„Eins og undanfarna mánuði gengur uppsteypa meðferðarkjarnans vel og nú er búið að steypa þakplötur á stangir 1 og 2. Stangir 1 og 2 í meðferðarkjarna eru komnar í fulla hæð. Framkvæmdir ganga vel í stöngum 3, 4 og 5. Samhliða uppsetningu stálvirkis í millibyggingum er verið að slá upp og steypa stigahlaup í stigahúsum. Helstu verkþættir sem nú eru í gangi við uppsteypuna eru við mótauppslátt, járnabendingu, eftirspennu og uppsetningu stálvirkis. Vinna við tengiganga er í fullum gangi sem og við bílastæða- og tæknihúsið. Uppsteypa bílakjallara austan við meðferðarkjarna er hafin, þar sem verið er að steypa þrifalög og undirstöður. Reiknað er með að uppsteypu stanga og millibygginga meðferðarkjarna verði lokið á fyrsta ársfjórðungi 2024. Uppsetning útveggjaklæðningar stangar 1 hefst í október 2023,“ segir Árni Kristjánsson staðarverkfræðingur Nýs Landspítala.

## NLSH falið að vinna að verkefnum við sjúkrahúsið á Akureyri (SAk)



Byggð verður legudeild við sjúkrahúsið á Akureyri

Heilbrigðisráðuneytið hefur falið NLSH að vinna að endurskoðun á frumathugun á byggingu legudeildar við sjúkrahúsið á Akureyri.

Gert er ráð fyrir að endurskoðuninni ljúki á næstu mánuðum og búist er við að útboð á fullnaðarhönnun hússins fari fram á haustmánuðum.

Þá mun NLSH tryggja að fram fari ástands-, eiginleika- og hentugleikaskoðun á eldri byggingum. Gert er ráð fyrir að útboð á hönnun verði lokið í haust og innan fimm ára verði búið að byggja nýja legudeild og breytingar gerðar á legudeildarstarfsemi í eldri byggingum spítalans. Samkvæmt frumathuguninni frá 2021 eru 84 legurými á 3 deildum, 36 rúm á skurðlækningadeild, 36 rúm á lyflækningadeild og 12 rúm á geðdeild. Samkvæmt frumathuguninni frá 2021 er húsið 9.200 m<sup>2</sup>.

„Það hefur safnast mikil þekking og reynsla hjá NLSH við hönnun og framkvæmdir við nýbyggingar fyrir Landspítala. Það er skynsamlegt að nota þá þekkingu við uppbryggingu á Akureyri. Við komum til með að vinna með stjórnendum og starfsmönnum SAK að þessu verkefni og erum full tilhlökkunar að byrja af krafti eftir sumarfrí,“ segir Ingólfur Þórisson sviðsstjóri tækni – og þróunarsviðs NLSH.

## Fjölbreytt dagskrá á sumarmálstofu NLSH



Hin árlega sumarmálstofa NLSH nýtur ávallt vinsælda

Þann 22. júní var haldin árleg málstofa NLSH með fjölmögum erindum um stöðu framkvæmdaverkefna NLSH. Auk erinda starfsmanna NLSH héldu Svava María Atladóttir, framkvæmdastjóri þróunar Landspítala, erindi um þróun heilbrigðistækni, og Ásgeir Margeirsson, formaður stýrihóps um skipulag framkvæmda við Landspítala, erindi um forsendur fyrir endurmati á 2. áfanga uppbyggingar Landspítala. Lokaorð flutti Nanna Briem, framkvæmdastjóri geðþjónustu Landspítala. Í-lokin var tónlistarflutningur Elínar Hall en það er venja að ljúka sumarmálstofunni á ljúfum nótum.

## Heimsókn frá þýskum fagaðilum



Það ríkti mikil ánægja með heimsóknina meðal Þjóðverjanna

Um miðjan maí kom í heimsókn fjölmennur hópur frá Þýskalandi. Í hópnum voru fulltrúar frá félagasamtökunum VDBUM í Þýskalandi sem er félag byggingariðnaðar, umhverfis- og vélaverkfræði og faglegt hagsmunafélag og vettvangur fagfólks í byggingariðnaði. Meðlimir eru einnig sérfræðingar, háskólakennrarar og fulltrúar félagasamtaka.

Sigríður Sigurðardóttir, sviðsstjóri hönnunarsviðs NLSH, sá um kynninguna og að henni lokinni var framkvæmdasvæðið skoðað undir stjórn Steinars Þórs Bachmann og Árna Kristjánssonar á framkvæmdasviði.

„Þetta var mjög fræðandi heimsókn og allir voru ánægðir og mjög heillaðir af þessu stóra verkefni,“ segir Brigitte Visbeck leiðsögunaður og talsmaður hópsins.

## SPITAL hópurinn heimsækir framkvæmdasvæðið



SPITAL hópurinn vann að frumhönnun og skipulagsgerð og sér einnig um gatnahönnun


Í lok maí kom SPITAL hópurinn í heimsókn sem samanstendur af eftirtoldum fyrirtækjum: ASK arkitektar ehf, Bj.Snæ.slf, Efla ehf, Lagnatækni ehf, Kanon arkitektar ehf og Teiknistofan Tröð ehf.

Framkvæmdastjóri NLSH, Gunnar Svavarsson, tók á móti gestum og fór yfir stöðu dagsins í verkefnum félagsins. Að því loknu var framkvæmdasvæðið skoðað þar sem Ásbjörn Jónsson, sviðsstjóri framkvæmdasviðs, fylgdi gestum um svæðið. Mikil ánægja var með heimsóknina enda margir innan SPITAL hópsins sem hafa komið að verkefninu á einn eða annan hátt.

„Í sumar eru 13 ár liðin frá því að SPITAL hópurinn vann samkeppnina um Landspítalann. SPITAL hópurinn hóf vinnu við gerð deiliskipulags og forhönnun bygginga haustið 2010 og verkinu var skilað um áramótin 2012-2013. Því má segja að SPITAL hópurinn hafi tengst verkefninu allar götur síðan en hönnunarverkefnið „götur, veitur, lóð“ er þar viðamest. Okkur þótti tímabært, nú þegar meðferðarkjarninn er farinn að taka á sig mynd, að hópurinn fengi kynningu á stöðu verkefnisins ásamt stuttri vettvangsferð um byggingarstaðinn. Uppbygging svæðisins byggir enn á þeiri hugmynd, sem varð til í okkar hópi við vinnslu samkeppnistillögunnar og þeiri vinnu sem fylgdi í kjölfarið við gerð deiliskipulagsins. Aðrir tóku við forhönnun að húsunum og fróðlegt er að sjá hvernig hönnunin hefur breyst. Þó meðferðarkjarninn líti talsvert öðruvísi út nú en í okkar forhönnun og innra skipulag hafi breyst talsvert mikið er það þó samt svo að meginuppgjöggingin er sú sama og við lögðum upp með í byrjun,“ segir Helgi Már Halldórsson hjá ASK arkitektum.

## Skýringarmynd

Yfirlitsmynd af svæðinu sem sýnir framkvæmdasvæði nýs Landspítala og gönguleiðir



### Nánari upplýsingar.

Allar upplýsingar um framkvæmdina verða birtar á upplýsingasíðum NLSH, Landspítala og Háskóla Íslands og annarra hagsmunaaðila eftir því sem verða vill. Einnig mun upplýsingum verða reglulega komið á framfæri í fjöldum ef miklar breytingar verða á umferðarfyrirkomulagi.

Nánari tæknilegar- og verkframkvæmdaupplýsingar veita:

Ásbjörn Jónsson sviðsstjóri framkvæmdasviðs NLSH, 841 7050 eða netfangið [asbjorn@nlsh.is](mailto:asbjorn@nlsh.is)

Aðrar almennar upplýsingar veitir Magnús Heimisson samskiptastjóri NLSH, 866 1378 eða [magnus@nlsh.is](mailto:magnus@nlsh.is)

Sértækar upplýsingar veitir af hálfu Landspítala Andri Ólafsson 863 8595 [andriol@landspitali.is](mailto:andriol@landspitali.is) og frá Háskóla Íslands Björn Gíslason 896 0876 [bgisla@hi.is](mailto:bgisla@hi.is)